



**JUDICIAL SYSTEM MONITORING PROGRAMME  
PROGRAMA DE MONITORIZAÇÃO DO SISTEMA JUDICIAL**

***Komunikadu Imprensa***

**Periodu : Janeiro 2011  
Edisaun : 12 Janeiro 2012**

**JSMP Hetan Oportunidade hodi Marka Audiência ho Vice Primeíru Ministru  
iha ninia Gabinete**

Iha lora 12 fulan Janeiro 2012, Programa de Monitorizasaun do Sistema Judisiál ka JSMP hetan oportunidade hodi halo audiência ho Vice Primeíru Ministru, Exelénsia Sr. José Luis Guterres iha ninia servisu fatin. Iha audiência ne'e JSMP ho nia equipa hamutuk ema nain hitu (7) no husi parte Gabinete Primeíru Ministru nian aliende Vice Primeíru Ministru rasik, partisipa mós husi asesor ba Sr. Vice Primeíru Ministru.

Iha JSMP nia karta pedidu ne'e tuir loloos atu halo audiência ho Exelénsia Primeíru Ministru Sr. José Alexandre Xanana Gusmão, maibé Exelénsia Primeíru Ministru iha ona asuntu importante seluk nune'e nia hatuun despaxu ba Vice Primeíru Ministru hodi hasoru malu ho JSMP. Maski la hasoru malu ho Exelénsia Sr. Primeíru Ministru diretamente, maibé JSMP nafatin sente kontente no hetan onra boot ida tanbá Exelénsia Sr. Vice Primeíru Ministru maske okupadu tebes maibé buka nafatin tempu hodi bele simu no rona JSMP nia hanoin konabá JSMP nia papel iha setór justisa no dezafiu sira iha setór justisa nian.

Similar ho audiência sira seluk ne'ebé JSMP halo ona ho autóridades kompetentes sira seluk iha tinan kotuk, audiência ne'e mós ho ojetivu atu introduz JSMP nia kna'ar ka papel ba iha autóridades sira no konvida ema hotu atu servisu koletivamente atu investe ba setór justisa. Aleinde ne'e, JSMP mós aproveita oportunidade ne'e hodi klarifika JSMP nia pozisaun ne'ebé durante ne'e JSMP halo hasoru polítika legislativu no polítika judisiri sira ne'ebé tuir JSMP nia hare la refleta ho realidade aktuál Timór Léste nian no obrigasaun Estadu Timór Léste atu asegura justisa ba povu tuir Konstituisaun no enkuadramentu juridika ne'ebé vigor. Kestaun sira ne'e inklui, independensia tribunál, separasaun poder, krime pasadu, rekursu umanus, lingua iha setór judisiri no iha setór lejislativu, kestaun práti sira seluk ne'ebé ligadu ho funsionamentu tribunál nian. Partikularmente, iha oportunidade ne'e, enkoraza autóridade kompetente sira atu hadok aan husi práti sira ne'ebé tenta atu hamihis independensia no kredibilidade tribunál nian. Purzemplu hanesan kazu Maternus Bere, iha tinan 2009.

Situasaun sira ne'e hotu JSMP halo ho intensaun mak atu asegura katak tribunál ezerse ninia funsaun tuir regra, konstituisaun no lei ou práti sira ne'ebé eziste iha Nasaun ida ne'e.

Diretór ezekutivu JSMP, Luis de Oliveira Sampaio *hateten katak governu ida ne'e iha komitmentu, polítika no vontade boot atu kombate korupsiun, maibé kuandu sistema la funsiona ho diak mak komitmentu no polítika diak sira sei la bele realiza. Tanbá tuir JSMP nia hanoin katak so liu husi setór judisiáriu ne'ebé forte mak ita bele asegura katak individu sira ne'ebé kontra sira nia obrigasaun no buka oportunidade atu benifisia sira nia aan no grupu bele simu responsabilidade tuir lei defini.*

Iha parte seluk, depoisde rona tiha esplikasaun husi JSMP, Exélsia Sr. Vice Primeíru Ministru iha nia intervensaun hateten *katak governu ida ne'e nakloke aan ba krítikas sira hotu no governu ida ne'e iha komitmentu boot konabá oinsá atu haburas demokrasia no liberdade ba espresaun iha nasaun ida ne'e. Governu ida ne'e kompriende didiak konabá papél sosiedade sivil nian hodi halo kontrollu sosiál atu nune'é buat hotu bele la'ó tuir dalan.*

Tuir Sr. Vice Primeríru Ministru katak 'kritika ne'e osa-mean', tanbá ne'e nia enkoraza JSMP atu kontinua ho papel ne'ebé durante ne'e JSMP halo atu kontinua dezafia polítika no asaun governu nian ne'ebé governu intruduz.

Liu tan, Sr. Vice Primeíru Ministru haktuir katak sosiedade sivil iha papél importante atu hatutan saída mak povu ne'e hakarak husi governu ida ne'e. Krítikas sira ne'e la'os mai husi sosiedade sivil sira deit, maibé akontese iha Parlamentu Nasionál hanesan partidu opozisaun halo krítikas makas konabá polítika governu nian, maibé governu ida ne'e sempre respeita no konsidera krítikas sira ne'e hotu, tanbá governu hakarak demokrasi no liberdade ne'e buras iha ita nia rain ida ne'e. Nune'é iha ninia lia menon ikus ba JSMP katak tenki kontinua nafatin papél importante ne'e nune'é bele asegura sistema demokrasia no bele funsiona ho diak tuir regra ne'ebé mak estabesele ona iha ita nia nasaun ida ne'e.

Antes atu remata JSMP hato'ó ninia agradesimentu ba esforsu tomak ne'ebé governu ne'e halo ona maski JSMP rekoñese iha buat barak mak persiza fo prioridade liu-liu iha prosesu hari systema justisa ida ne'ebé forte no kridivél hodi asegura justisa ba ema tomak iha nasaun ne'e.

Aliende ne'e JSMP iha oportunidade ne'e intrega mós relatóriu tematiku kazu 11 de Feveireiru ho Titlu Kazu 11 de Feveireiru 2008: Pergunta Barak Liu Duque Resposta « *Implikasaun ba Sistema Justisa iha Timor Leste* » no komunikadu imprensa konabá Dalan Naruk ba Setór Justisa iha Timór Léste “*Progressu no dezafius ba sistema judisiáriu iha Timór Léste durante tinan 2011*”

Atu hetan informaun klean liu tan favor kontaktu direitamente:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
Telefone: 3323883/7295795